

**AKASHVANI AIZAWL
REGIONAL NEWS BULLETIN**

Date – 26/01/2026

Time - 18:30 Hrs

HEADLINES (EVENING)

1. Republic Day vawi 77-na chu ram pumah ropui takin lawm a ni.
2. Home Minister Pu K. Sapdanga chuan Mizorama raltlan chhawmdawlna senso atan sorkar laipui-ah tanpuina sum an dil thu a sawi.
3. Ramchhung hmun dangte rualin India Republic Day vawi 77-na chu Mizoram district hrang hrangah pawh hman a ni.
4. Kumina ramchhung civil mite chawimawina ngaihhlutawm, Padma award chi hrang hrang dawng tur mi 131-te hming puan a ni.

<><><>

R-DAY

Ram Danpui hman tan ni, Republic Day vawi 77-na chu tukin khan Mizoram hmun hrang hrangah lawm a ni a, a lawmna pui ber Aizawlah chuan Lammualah Larsap Gen. Vijay Kumar Singh hova hman a ni.

Larsap hian India hnam puanzar pawtparhin parade contingent 23 te'n hnam puanzar zahna chibai an buk chu a chhanglet a. Hemi hnu hian Republic Day puala thuchah sawiin, Mizoram mipuite chu Republic Day vawi 77-na pualin chibai a buk a, India khua leh tui zawng zawngin dikna, zalenna leh intluktlanna an lo neih theih na'n Ram Danpui chu hman a ni a ti a. Larsap chuan Mizoram sorkar flagship programme, Bana Kaih (Hand Holding) Scheme chuan a thawh hnihna a thleng tawh a, mi tam takin tanpuina an dawng tawh a, Chief Minister's Special Package Grant hnuaiah pawh sum sem a ni tawh a ti.

Mizoram tana mellung pawimawh tak, Bairabi-Sairang rel kawng thar chu India Prime Minister Pu Narendra Modi chuan nikum September 13 khan hawngin, Mizoram khawpui, Aizawl kawtkai a rel rawn lut hmasa ber niin, rel rawn lut chuan zin hunchhung a ti tawi a, bungraw lakluh man a ti tlawm a, sumdawna, khualzin hip leh eizawna lamah kawng nasa takin a hawng dawn a ni, a ti a. Mizoram chu hmarchhak state zinga tourism-a thang duangber pawl a ni tih sawiin, kum 2024-2025 chhung khan Mizoram khualzin nuai 5 chuang rawn lutin, khualzin rawn lut hi za zela 139 in a pung a, kum 2025-2026 ah pawh pun belh zelin October 2025 thleng khan khualzin nuai 4 chhinchhiah tawh a ni a ti a. Art & Culture Department bultumin Zokhua, Falkawnah pipute khawsak dan leh nunphung pholanna Live Museum buatsaih a ni a. Hei hian tualchhung mite leh thalaite tana sum lakluhna hnar a siam a, zinmite'n Mizo kutchhuak an lei theih mai bakah Mizo nihna leh hnam ziarang chawilar na'n a pawimawh hle tih a sawi a ni.

Mizoram Police chuan cheng vaibelchhe 816 vel hu ruihhlo manin, thubuai 217 an siam a, mi 338 an man a ti a. Kuhva tawlhruk cheng vaibelchhe 17 leh nuai 8 hu leh a inhnawnawihthe an man a. Dan lova zu zawrh thahnem tak man a ni a, thubuai 82 ziah luh niin, mi 99 man an ni a ti a. Hei bakah hian silai 42, a mu tam tham tak leh a neitute manin, thubuai an siamsak thu a sawi a. Excise & Narcotics Department pawhin ruihhlo hmanga sumdawng dan bawhchhia mi 611 mana hremen, ruihhlo kg 474 dawn lai an man a, ganja chinna hmunte an tichhe bawk.

Mizoram Sorkar chuan hriselna tihchangtlung kawngah nasa takin tan a la a, Zoram Medical College & Hospital hnuaia department 8 chuan NQAS national certification hmuin ngaihhlut hlawh tak Platinum category dinhmun a luah pha a. Department of Microbiology hnuaia Viral Research and Diagnostic Laboratory (VRDL) chuan 'National Excellence Award' dawngin India ram pumah 5-na a ni a. Health & Family Welfare Department chuan Mizoram chhung leh pawna empanelled hospital-ah man chawi lova mipuite an inenkawl theihna tur Mizoram Universal Health Care Scheme (MUHCS) a duang a. Mizoram chhunga Sorkar hospital zawng zawng, private

hospital 13, Day Care Centre 3 leh Mizoram pawna private hospital 25-ten he scheme hi an zawm tawh bawk a ni, a ti.

Larsap chuan Mizoram chu zirna lamah pawh hmasawn zelin Higher & Technical Education Department hmalakna in Mizoram State University Bill 2025 pass a ni tawh a. Pukpui-ah kum 2026 - 2027 academic session atanga zirna kalpui theih turin Mizoram Engineering College din turin hmalak mek ni a ti a. Nikum 2025 May 20, khan ziaik leh chhiar thiam vekna state hmasa ber, First Fully Literate State-a Mizoram puan a ni chu zirtirtute, zirlaite leh mipuite inkarah thawhhona tha taka awm a ni tih tarlangtu a ni tih sawiin. Mizo Language Development Board chuan Indian Constitution 8th Schedule-a Mizo tawng telh a nih ve theihna turin, zir chiang tur pawl study group an din tih a sawi a. Industry lamah pawh Mizoramin hma a sawn hle tih sawiin, lungalhthei laih chhuah hna (coal exploration) Rotlang West Block, Lunglei district-ah thawh mek a ni a ti bawk.

Akashvani Aizawl pawhin Tuikhuahtlanga an hmun puiah he hun hi an hmang a. Cluster Head DR Lalropaia chuan India Republic Day-ah ram tana nunna hlan tawh te an hre reng a ti a, India chuan khawvel ram zingah khawvel a ram hmasawn zinga chhiar tel turin hma a la mek tih sawiin sawrkar hna thawktute chu India in ram hmasawn anih theihna turah tih tur an neih ve tih sawiin mahni zawn theuhah hmasawn a pawimawh tih a sawi.

<><><>

REFUGEES

Home Minister Pu K. Sapdanga chuan Mizorama raltlan tam tak rei tak awm tawhte enkawlna senso atan sorkar laipui-ah tanpuina sum an dil thu a sawi.

Vawiina Akashvani Aizawl News a hrilh danin Pu K. Sapdanga chuan raltlante tanpuina atan hian central sorkarah cheng vaibelchhe 5 an dil mek a, buaipui mek a nih thu a sawi a. An sorkar hnu-ah central sorkar chuan raltlante chhawmdawlana atan hian buhfai cheng vaibelchhe 5 hu leh a pawisa-in cheng vaibelchhe 5 a rawn pek tawh thu a sawi a. An cham rei tawh chungin Mizoram mipuite’n harsa takin an la chhawmdawl hram hram thei niin a sawi a eng chen nge an chhawmdawl zui theih ang tih chu hriat a harsat thu a sawi a. Central sorkar tanpuina an mamawh thu a sawi a ni.

Tun dinhmun hnunhng berah Myanmar raltlan hi Mizoramah 28,964 an awm mek a. Raltlan awm zat hi a danglam reng a, lo luh belh an awm zeuh thin rualin an awm thinna a ralmuan deuh chuan an kir leh a. Thenkhat, Mizoram ramri hnaiha awmte chu an leilet leh thlawhhma-ah te an han thawk leh thin bawk a, chuvangin awm zat hi a danglam reng a ni. Bangladesh Chittagong Hill Tracts atanga rawn raltlan zat hi a danglam nasa ngai lova, tunah hian mi 2,360 an awm mek a, an awm tamna ber Lawngtlai district-ah mi 2,042 an awm mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

R-DAY: DISTRICTS

Ramchhung hmun dangte rualin India Republic Day vawi 77-na chu Mizoram district hrang hrangah pawh hman a ni.

Mamit District-ah chuan GSA Playground-ah hman niin, District Bawrhsap pu K Laltlawmlova chua hnam puanzar pawt pharhin parade contingents 13 te hnam puanzar chibai buk a chhanglet a. Lawngtlai district-ah chuan Central Young Lai Association, Play Ground-ah lawm a ni a, Lawngtlai Bawrhsap Pu Donny Lalruatsanga chuan Hnam puanzar pawtpharhin Parade Contingent 14 ten Hnam Puanzar chibai an buk a chhanglet a. Saitual district-ah chuan Keifang Centenary Sports Complex-ah hman a ni a, District Bawrhsap, Dr. Lalgura Tlau chu khuallian niin parade contingents 15 te hnam puanzar chibai buk a chhang let a ni.

Lungleiah chuan C. Thuamluaia Mualah hman niin, Lunglei Bawrhsap Pi Navneet Mann, IAS chu Khuallian niin, Hnam Puanzar chibai buku parade contingent 22 te chibai buka chhang let a, Siaha ah chuan Siaha District Football Association (SDFA) ground, Meisatla-ah hman niin, District Bawrhsap Pu VL Hruaizela Khiangte chuan Hnam puanzar a pawh pharh rualin parade contingent 19-in hnam puanzar chibai an buka chhanglet a, Champhaiah chuan Chhangphut Field-ah lawm niin, Champhai Bawrhsap Pu Mohammad Aaqib chu khuallian a ni a, hnam puanzar pawt pharhin, parade contingent 17 chibai buka chhanglet.

Khawzawlah chuan Mualvawm Field-ah lawm niin, Khawzawl bawrhsap Pu K. Vanlalthiana chuan Hnam Puanzar pawt pharhin, Hnam Puanzar chibai buku parade contingent 15 te chibai buka chhang let a, Kolasib ah chuan Kolasib Sports Stadium lawm niin, District bawrhsap Pu Robert C Lalhmangaiha chuan hnam puanzar pawt pharhin Parade Contingent-12 in hnam puanzar zahna chibai an hlan a chhanglet a, Serchhip District-ah chuan Serchhip Sports Complex-ah lawm niin khuallian, Serchhip Bawrhsap Pu Paul L Khuma chuan hnam puanzar pawt pharhin, Parade Contingent 13-in hnam puanzar chibai an buka chhanglet a, Hnahthial District-ah chuan HDSC/HDFA Turf Ground-ah hman niin Bawrhsap, Pi K.Vanlalruati chuan hnam puanzar pawt pharhin parade contingent sawm(10) chibai bukna chu a chhang let a ni.

<><><>

R-DAY IN DELHI

Ramchhunga Republic Day lawmna pui ber chu President Droupadi Murmu-i hovin New Delhi-a Kartavya Path-ah neih a ni a, European Council President, Antonio Costa leh European Commission President, Ursula von der Leyen-te chu khuallian an ni. Hnam puanzar pawh pharh hnuah 105mm Light Field Gun hmangin 21-gun salute neih a ni a, President hian Indian Air Force Group Captain, Shubhanshu Shukla hnenah huaisen chawimawina sang ber, Ashoka Chakra a hlan bawka ni.

<><><>

PADMA AWARDS

Kum 2026 atana ramchhung civil mite chawimawina ngaihhlutawm

, Padma Award dawng tur mi 131-te hming, sorkar laipuiin a puanga, Padma Vibhushan dawng tur mi 5, Padma Bhushan dawng tur mi 13, Padma Shri dawng tur mi 113 an awm a ni. Chawimawina dawng tur zingah hian hmeichhia 19 an tel a, an thih hnua chawimawi tur mi 16 an awm bawka.

Padma chawimawina dawng tur langsar zual zingah filmstar, Dharmendra leh Mammooty, Judge, KT Thomas, politician VS Achuthanandhan, zaithiam Alka Yagnik leh cricketer Rohit Sharma te an tel a, India hmeichhe cricket team captain, Harmanpreet Kaur pawhin Padma Shri a dawng dawn a ni.

<><><>